

修訂日期: 2009/04/23 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 20, No. 1181

原始資料: 蕭鎮國大德提供, 北美某大德提供

No. 1181 [No. 1182, cf. No. 1191]

大方廣菩薩藏經中文殊師利根本一字陀羅尼經

大唐北印度迦濕彌羅國三藏寶思惟譯

如是我聞。一時佛住淨居天寶莊嚴道場中。與大菩薩及淨居諸天眾俱。爾時世尊大慈大悲。於此會中普告一切諸天眾言。汝等善聽文殊師利童子行輪呪法。為欲守護諸眾生故。一切如來所有祕密心大神呪王。我今當為汝等開示顯說。若有誦者。我記此人則為已持一切諸呪悉皆圓滿。一切所作皆得成就。更無過者。汝等應知此陀羅尼。於諸呪中是大神呪王有大神力。若善男子善女人能受持者。文殊師利童子菩薩常來擁護。或於覺時或於夢中。為現身相及諸善事。能令此人生大歡喜。諸善男子此之呪王尚能攝得文殊師利童子菩薩。況餘菩薩及世出世賢聖等眾。復次善男子。此呪能消一切災障一切惡夢。一切怨敵一切五逆四重十惡罪業。一切惡邪不祥呪法。亦能成辦一切善事具大精進。當知是呪於世出世種種呪中為最殊勝。是諸佛心能令一切所願皆悉滿足。若以五色綆。結呪索繫其項上。擁護其身亦令諸願。皆得圓滿無超過者。即說呪曰。

唵齒[口*臨](二合[口*臨]字離禁反)

諸佛子等此呪能滅一切惡邪魍魎。諸鬼是一切諸佛吉祥之法。亦能成就一切神呪。誦此呪者。能令眾生起大慈心。能令眾生起大悲心。一切障礙皆得消滅。所有諸願皆得滿足。未作法時。即能成辦如意之事。若發無上大菩提心。誦之一遍力能守護自身。若誦兩遍力能守護同伴。若誦三遍力能守護一宅中人。若誦四遍力能守護一城中人。若誦五遍力能守護一國中人。若誦六遍力能守護一天下人。若誦七遍力能守護四天下人。若以清旦誦一遍。呪水洗面能令見者歡喜。呪香熏衣亦令見者歡喜。若患齒痛。呪揩齒木嚼之。揩齒所痛即差。若有女人產難之時。取阿吒盧沙迦根或郎伽利迦根。呪之七遍。以無虫水和摩之。塗於產女臍中兒即易生。或諸男子為箭所中。鏃入筋骨拔之不出。以十年酥三兩呪一百八遍。安瘡中及食之。箭鏃即出。若婦人五年乃至二十三十年不生男女者。或自有病。或男子有病。鬼魅所著種種病等。或為毒藥所中。當以十年已上酥五兩。孔雀羽一兩內於酥中呪之二十一遍。煎之擣為末。以石蜜一兩大呵梨勒三顆。去核取皮相和。呪之一百八遍。常以清旦空腹盡服之。於七日中即有男女。若患頭痛以烏翅羽呪之七遍。拂病人頭患即除愈。若患瘡病一日二日乃至七日。或常患者。以純乳煮粥。著好酥一兩呪之一百八遍。與病人服之即得除愈。諸善男子以要言之。若欲合和一切湯藥及欲服者。先須至心誦之二十一遍速得如願。復

次善男子若有一切眾生。為飛頭鬼所執。以手自摩其面。誦呪一百八遍作可畏相貌。便以左手作本生印。以大母指屈在掌中。用後四指押大母指上。急把拳。即自努目陰誦此呪。而看病者所患即除。若人患一切鬼病。以呪呪右手一百八遍。燒安息香熏之。左手作本生印。右手磨病人頭患即除愈。若有怨敵及諸惡夢。種種怖畏身心不安。以七色綆結呪索作蓮花形。或作輪形或作金剛杵形。呪之一百八遍。燒安息香熏之。於七日中繫自身項上。一切厄難悉皆消散。或以牛黃研之為墨。於淨紙上或帛練上。畫作所怖者形。於其四邊作齒[口*臨]字圍之。或作蓮花或作輪字。或作卍字螺魚金剛鉤寶瓶等圍之。呪之七遍所怖即除。諸善男子若欲經過師子虎狼毒蛇怨賊一切險難之處。當須淨其身心。不得近諸女人及喫一切五辛酒肉芸薑胡荽。於諸眾生起大悲想。至心誦呪之四十九遍。而諸怨惡自然退散。縱令遇之無不歡喜。諸善男子此呪縱令一切眾生。或於一劫或無量劫。乃至名字不可得聞。何況得見。專心念誦假令七寶象馬滿閻浮提。猶是世間滅壞之法。此陀羅尼呪。能令眾生現世當來常獲安隱。與諸如來大菩薩眾常為眷屬。若為自身若為他身。所願皆得。是故慇懃生難遇想。勿得輕慢起疑惑心。

大方廣菩薩藏經中文殊師利根本一字陀羅尼經